

DECLARATION

DV ROY, PAR LAQUELLE
BENIAMIN DE ROHAN,
Sieur de Soubize, est declaré cri-
minel de leze Majesté au premier
Chef : ses biens acquis & confis-
quez, & reünis au Domaine de sa
Majesté.


Verifiée en Parlement le 4. Aoust 1622.



A PARIS,
Chez F. D. MOREL, & P. METTAYER,
Imprimeurs ordinaires du Roy.

M. DCXXII.

Avec Privilege de sa Majesté.



OVIS par la
 grace de Dieu
 Roy de Fran-
 ce & de Na-
 uarre, A tous
 ceux qui ces presentes Let-
 tres verront , Salut. Si
 doubter que le chastiment
 des meschans ne soit du
 tout necessaire à la conser-
 uation des Estats, ou autre-
 ment y permettre vn esta-
 blissement pour abolir la
 loy des recompenses , &

rendre les actions des hommes égales ou du moins indifferentes , laissant lieu à vn chacun de croire que bien ou mal faire est chose où il n'y a point de choix : Et par telle creance enraciner dans les esprits des peuples des maximes pour les porter à des reuoltes, dont souuent s'ensuit le renuersement des Monarchies : Tout Prince sage & bien conseillé, doit prendre d'autres maximes : A sçauoir, d'esleuer en dignité ceux dont la conduite les rend

recommandables : Et au contraire, faire chastier & proceder extraordinairement contre les autres, afin que par vn tel chastiment il puisse contenir vn nombre infiny de personnes en leur deuoir : Et par ceste exemple de Iustice, affermir d'autant plus sa iuste & legitime domination, laissant à vn chacun la libre iouïssance de son bien dans vne paix tranquille, où Dieu estant honoré, comble son regne de benediction. S'il doit cela à sa di-

gnité, au double y est obligé contre ceux qui mesprisans les choses sacrees, profanent la Religion: Et lors esmeu de iuste colere, il doit estre porté à vn chastiment exemplaire. Les crimes qu'a commis Benjamin de Rohan, sieur de Soubize, dans nos pays de Xaintonge, & autres Provinces, ont attiré sur luy la main de Dieu, qui seul à nostre veüe, a dissipé ses forces de telle sorte, que ne trouuant salut qu'en sa fuite, il est sorty de nostre

Royaume à dessein de continuer hors d'iceluy de nouvelles conspirations, qui le rendent indigne de tout pardon, & coupable au premier chef de crime de leze Majesté, dont l'enormité demande la punition.

Pour ces causes, Sçauoir faisons, que de l'aduis des Princes de nostre Sang, autres Princes, & plus notables personnages de nostre Conseil, & de nostre certaine science, pleine puissance & auctorité Royale, Nous auons dict & decla-

ré, Difons & declarons par
ces prefentes, fignees de no-
ftre main, ledit de Rohan
criminel de leze Majesté
au premier chef, indigne
de nos graces, incapable
de tous honneurs, charges
& offices quelconques, en
ceftuy nostre Royaume,
terres & feigneuries de no-
ftre obeiffance : Ses biens
acquis & confisque par le-
dit crime de leze Majesté
au premier chef. Voulons
iceux eftre reünis insepara-
blement à nostre Domai-
ne, fans que ores, ny pour
l'adue-

l'aduenir, ils en puissent
estre separez ny desvnis,
pour quelque cause, occa-
sion & consideration que
ce soit. Et que à ceste fin il
soit procedé extraordina-
irement contre luy, à la di-
ligence de nostre Procu-
reur general, selon les Loix
& Ordonnances de nostre
Royaume.

Si donnons en mande-
ment à nos amez & feaux
Conseillers, les gens tenans
nostre Cour de Parlement
à Paris, que ces presentes
ils fassent lire, publier & en-

B

registrer , & le contenu en
 icelles exactement execu-
 ter : Enjoignant à nostre dit
 Procureur general faire toutes
 poursuites & diligences
 requises pour ladite execu-
 tion : Car tel est nostre plai-
 sir. En tesmoin dequoy,
 Nous auons faict mettre
 nostre scel à cesdites presen-
 tes. Donné à Carcassonne
 le quinzième iour de Juil-
 let, l'an de grace mil six cens
 vingt-deux. Et de nostre
 regne le trezième.

Signé,

LOVIS.

Et sur le reply, Par le Roy,
Et plus bas, DE LOMENIE.

Et scellée sur double queüe
du grand seau de cire iaune.

Et à costé sur ledit reply,
est encores escrit,

*Leües, publiées et registrées,
Ouy, et ce requerant le Procureur
general du Roy, pour estre
executees selon leur forme et te-
neur: et ordonné que copies d'i-
celles collationnées seront enuoyees
aux Bailliages et Seneschaußées
de ce ressort: pour y estre pareil-
lement leües, publiées, registrées,*

*et executées à la diligence des
Substituts du Procureur general
du Roy ; Ausquels enioint de tenir
la main à l'execution d'icelles , et
certifier la Cour auoir ce faict au
mois. A Paris en Parlement le
quatriesme iour d'Aoust mil six
cens vingt-deux.*

Signé, DV TILLET.

Sommaire du Privilege.

PAR Lettres patentes du Roy, donnees à Paris le vingt-deuxiesme iour de Feurier, mil six cens vingt, signees, LOVIS, & sur le reply, Par le Roy, DE LOMENIE, & scellees du grand scel dudit Seigneur, en cire iaulne, sur double queüe: verifiees, tant en la Cour de Parlement, Chambre des Comptes, Cour des Aydes, Chastelet de Paris, qu'au Bailliage du Palais: Il est permis à Federic Morel, & Pierre Mettayer ses Imprimeurs ordinaires, d'imprimer, ou faire imprimer, vendre & debiter tous Edicts, Ordonnances, Mandemens, Lettres patentes, comme aussi tous Arrests, tant de son Conseil, que de ses Cours, sans qu'autres Libraires & Imprimeurs les puissent imprimer ne faire imprimer, vendre ne distribuer, en quelque sorte & maniere que ce soit, sur peine de cinq cens liures d'amende. Voulant au surplus, que tout ce qui se trouuera imprimé de ce que dessus, par autres que lesdits Morel & Mettayer, soit saisi & cancelé comme nul & faulx, & faiet contre son auctorité & commandement.

